

Dividen 5.20 sen untuk ASN2
Malaysiakini.com
June 23, 2010

Amanah Saham Nasional Bhd (ASN) hari ini mengumumkan dividen sebanyak 5.20 sen seunit bagi Amanah Saham Nasional 2 (ASN2) bagi tahun kewangan yang berakhir pada 30 Jun, 2010, membabitkan RM11.2 juta dalam jumlah pembayaran.

Sebanyak 9,237 pemegang unit yang memiliki 215 juta unit akan mendapat faedah daripada pembayaran berkenaan.

Pengerusi Permodalan Nasional Bhd, Tan Sri Ahmad Sarji Abdul Hamid, berkata ASN2 menunjukkan prestasi yang baik sepanjang tahun kewangan berakhir 30 Jun, 2010, berbanding tempoh yang sama tahun lalu.

"Ini seiring dengan prestasi ekonomi negara dan bursa tempatan yang menggalakkan yang menyaksikan indeks FBM KLCI melonjak 24.19 mata kepada 1,075.24 pada Isnin," katanya pada sidang media di Kuala Lumpur.

Sehingga Isnin, ASN2 mencatatkan pendapatan kasar sebanyak RM18.47 juta, meningkat 70.54 peratus daripada RM10.83 juta pada tahun kewangan sebelumnya.

Daripada jumlah berkenaan, keuntungan daripada jualan saham sebanyak RM11.46 juta, RM5.66 juta diperoleh daripada syarikat dilabur dan RM1.35 juta diperoleh daripada pelaburan lain.

Sementara itu, semua urusan niaga ASN2 akan digantung mulai hari ini hingga 30 Jun bagi memudahkan pengiraan dividen.

- Bernama

Copyright © 1999-2007 Mkini Dotcom Sdn. Bhd.
Source : <http://www.malaysiakini.com/news/135332>